



Na osnovu člana 15. stav 1. tačka 2. Zakona o principima lokalne samouprave u Federaciji Bosne i Hercegovine ("Službene novine Federacije BiH" broj 49/06 i 51/09), člana 66. Zakona o pravima, obavezama i odgovornostima pacijenata ("Službene novine Federacije BiH", broj 40/10), člana 14. Zakona o zdravstvenoj zaštiti ("Službene novine Federacije BiH", broj 46/10 i broj 75/13), člana 25. Statuta Općine Centar Sarajevo-prečišćeni tekst ("Službene novine Kantona Sarajevo" broj 23/04) i člana 3. Odluke o osnivanju Zdravstvenog savjeta Općine Centar Sarajevo („Službene novine Kantona Sarajevo“, broj 7/17), Općinski načelnik objavljuje

## **JAVNI POZIV** **za izbor i imenovanje članova Zdravstvenog savjeta** **Općine Centar Sarajevo**

### **I**

Objavljuje se Javni poziv za izbor i imenovanje članova Zdravstvenog savjeta Općine Centar Sarajevo (u daljem tekstu: Zdravstveni savjet).

Zdravstveni savjet broji devet članova koji se imenuju iz reda:

- predstavnika pacijenata,
- predstavnika mladih,
- predstavnika općinskog organa uprave,
- predstavnika komora iz oblasti zdravstva,
- predstavnika stručnih udruženja,
- predstavnika udruženja za zaštitu prava pacijenata,
- predstavnika sindikata zdravstvenih ustanova,
- predstavnika zdravstvenih ustanova odnosno privatnih praksi,
- predstavnika crvenog krsta/križa s područja općine,
- predstavnika zdravstvenih radnika iz zdravstvenih ustanova na području Općine Centar Sarajevo i
- predstavnika penzionera.

Zdravstveni savjet imenuje načelnik, na osnovu javnog poziva, na period od 4 godine sa mogućnošću reizbora.

### **II**

Kandidat za člana Zdravstvenog savjeta treba da ispunjava slijedeće uslove:

1. da je punoljetni državljanin Bosne i Hercegovine (dokaz: uvjerenje o državljanstvu, ne starije od 6 mjeseci),
2. da ima prijavljenu adresu prebivališta-boravišta na području Općine Centar Sarajevo (CIPS prijavnica, ne starija od 3 mjeseca),
3. da ima minimalno tri godine radnog iskustva u instituciji, ustanovi, udruženju, nevladinoj organizaciji ili zdravstvenom sindikatu (dokaz: potvrda izdata od strane institucije, ustanove, udruženja, nevladine organizacije ili zdravstvenog sindikata),
4. da uživa ugled i ima evidentne rezultate rada u oblasti u kojoj djeluje (dokaz: potvrda izdata od strane institucije, ustanove, udruženja, nevladine organizacije ili zdravstvenog sindikata).

### III

Zdravstveni savjet obavlja sljedeće poslove:

- predlaže i evaluira sprovođenje zdravstvene zaštite na području jedinice lokalne samouprave;
- daje mišljenje na planove i programe zdravstvene zaštite za područje lokalne samouprave, te predlaže mjere za poboljšanje dostupnosti i kvaliteta zdravstvene zaštite na svom području;
- prati primjenu propisa na području jedinice lokalne samouprave koji se odnose na zaštitu prava i interesa pacijenata, uposlenih i zdravstvenih radnika;
  - organizuje obrazovne kurseve za građanstvo iz poznavanja materije o pravima pacijenata i postojeće legislative;
- daje preporuke za organizaciju kurseva u zdravstvenim ustanovama radi upoznavanja rukovodstva i zdravstvenih radnika s konceptom prava pacijenata, legislativom i odgovarajućim nužnim promjenama u zdravstvenim ustanovama;
- prati povrede pojedinačnih prava pacijenata na području jedinice lokalne samouprave;
- predlaže preduzimanje mjera za zaštitu i unapređenje prava pacijenata i zdravstvenih radnika na području jedinice lokalne samouprave;
- bez odgađanja obavještava zdravstveni savjet u kantonalnom ministarstvu o slučajevima težih povreda prava pacijenata koje mogu ugroziti život ili zdravlje pacijenata i zdravstvenih radnika;
- podnosi skupštini jedinice lokalne samouprave i kantonalnom ministarstvu godišnji izvještaj o svom radu;
- obavještava javnost o povredama prava pacijenata i zdravstvenih radnika;
- obavlja druge poslove određene zakonom.

### IV

Prijava treba da sadrži kraću biografiju o kandidatu, adresu i kontakt telefon kandidata, te dokaze o ispunjavanju uslova navedene u tački II ovog javnog poziva.

### V

Načelnik će formirati Komisiju za izbor i imenovanje članova Zdravstvenog savjeta koja će, na osnovu pristiglih prijava, predložiti listu kandidata za imenovanje u Zdravstveni savjet.

### VI

Javni poziv je objavljen na oglasnoj ploči Općine Centar Sarajevo, na web stranici Općine Centar Sarajevo ([www.centar.ba](http://www.centar.ba)) i obavještenje o javnom pozivu u dnevnim novinama "Oslobođenje".

Javni poziv ostaje otvoren 15 dana od dana objavljivanja, a o rezultatima javnog poziva podnosioci prijava će biti blagovremeno obaviješteni.

Prijave sa potrebnom dokumentacijom dostavljaju se u zatvorenoj koverti na protokol Općine Centar Sarajevo svakim radnim danom od 7,30 do 16,00 sati ili putem pošte na adresu: **Općina Centar Sarajevo, ulica Mis Irbina 1, 71 000 Sarajevo sa naznakom "Prijava na Javni poziv za izbor i imenovanje članova Zdravstvenog savjeta - ne otvarati"**.

Neblagovremene i nepotpune prijave neće se uzimati u razmatranje.

Broj:10-45-205/22

Datum:11.03.2022.godine

